

Formasaun animadór sira nian

2015

2

HA'U iha IMI LEET nu'udar IDA ne'ebé SERBÍ (Lk 22,27b)

Durante tempu Kuarezma, ita hanoin no hateke ba Jezús nia Kruz. Maibé Kruz mak pontu finál dalan Jezús nian, loloos, iha Ninia moris tomak, Jezús hatudu atitude ida (serbí) ne'ebé hetan iha kruz, ninia rezultadu. Jezús mak Maromak nia Oan mane, ne'ebé halo An hanesan Atan, no Maromak haruka Nia iha mundo atu realiza projetu salvasaun nian, liuhusi Kruz, atu soi ita hotu" (Amo Papa Francisco, Angelus 1/3/2015)

Se fulan kotuk ita refleto kona-ba Bibi-Atan Dia'k nu'udar modelu ba animadór salezianu ida, fulan ida ne'e ita refleto kona-ba estilu animadór nian: estilu serbisu nian.



(Lk 22,24-27)

²⁴Tuir mai, sira hahú haksasuk malu kona ba sira ida ne'ebé mak boot liu hotu. ²⁵Jezús dehan ba sira: "Liurai nasaun sira nian ukun ho kroat, no ema hanaran sira ne'ebé ukun sira 'tulun na'in.' ²⁶Imi fali keta halo nune'e; maibé ida ne'ebé boot liu iha imi leet, nia sei halo an nu'udar ki'ik liu; ida ne'ebé ukun sei halo an nu'udar atan. ²⁷Basa, ida ne'ebé mak boot liu: ida ne'ebé tuur han iha meja, ka ida ne'ebé serbí? La'os ida ne'ebé tuur han? Ha'u iha imi leet nu'udar ida ne'ebé serbí.

Evanjelista Mateus no Markos iha pasajen ida kuaze hanesan ho Lukas nia ida ne'e, maibé Lukas tau Jezús nia diskursu ne'e iha kontestu diferente: iha Lukas nia evanjellu, Jezús hateten liafuan hirak ne'e durante han kalan dala ikus; liafuan sira ne'e sai hanesan testamentu, lia-menon ikus ba sira ne'ebé tuir Jezús nia moris ho fidelidade. Tan ne'e, buat ne'ebé Jezús dehan hakarak tulun eskolante sira atu komprende akontesimentu sira ne'ebé sei tuir: Ninia mate mak hilin konxiente ne'ebé Jezús hola atu serbí ema sira to'o rohan.

Iha momentu ida ne'e, Jezús foin hateten ba eskolante sira katak sira ida sei saran Nia ba mate, nune'e, loloos, eskolante sira sente laran kanek, maibé ita haree katak sira la komprende, hodi: "hahú haksasuk malu kona ba sira ida ne'ebé mak boot liu hotu" no hatudu katak sira sei dook liu husi Jezús nia hanoin.

Atu sira bele komprende di'ak liután, Jezús ko'alia husi esperiénsia, hodi kompara estilu autoridade bainbain nian, no estilu ne'ebé komunidadade eskolante sira nian presiza hatudu. Jezús la kohi "reforma" autoridade sivil, maibé Nia hakarak katak sira ne'ebé tuir Nia tenke prontu atu sakrifika sira-nia moris, la'os hodi fakar raan de'it, maibé hodi serbí loran-loron maluk sira, hanesan atan ida. Liafuan ida ne'e mak "revolusaun" ida: saran ita-nia moris ba maluk sira mak "serbisu" bainbain, atu ida ne'ebé boot iha komunidadade tenke hala'o, ida ne'e mak atitude sarani sira nian, tanba tuir Kristu.

Iha pasajen ida ne'e mós hatudu katak ema bele "prezente" ba Eukaristia ka ba akontesimentu relijiozu ida, maib'e buat ne'e seidauk signifika katak nia fiel ba Maromak. Eskolante sira, ne'ebé moris hamutuk ho Jezús ba tinan tolu, foin simu Ninia Futar Isin no Raan, seidauk prontu atu serbí hanesan Jezús no, liuliu, seidauk barani atu mate hamutuk ho Nia.

REFLETE liuhusi ESPERIÉNSIA SALEZIANA

Ita ba lee dokumentu salezianu sira atu kompara buat ne'ebé sira husu ba sira ne'ebé rekoñese an iha Espiritualidade Saleziana, buat ne'ebé foin refleto no ita-nia esperiénsia.



“Jezús mak fó apoiu ba ita-nia knaar sira hodi marka ho konfiansa ba foin-sa'e sira, aten-brani, serbí vida iha moris loroloron hodi la lakon korajen no la ta'uk ba ain-hakat neineik, pasiénsia atu hein.”

LOME 40

“Dezafiu, ba ida ne'ebé hakarak komunika domin ba moris no esperansa kona-ba futuru ne'ebé di'ak liu, mak atu ho an rasik no ho konstánsia haka'as an atu buras iha umanidade, autenticidade no serbisu ba foin-sa'e feto no mane sira.”

LOME 75

“FMA, leiga no leigu sira, libur hamutuk iha haraik-an no atensaun atu serbí umanidade, liu-liu hirak ne'ebé terus liu, sira realiza ho autenticidade sira-nia vokasaun espesífika.”

LOME 77


Ho título “Serbí ho gratuidade”, hakerek: “Foin-sa'e feto no mane sira iha sensibilidade boot ba tulun resíproku, ba kompaixaun, ba solidariedade, ba justisa no ba damen. Dala barak, esperiénsia serbí nian, hatudu an nu'udar prosesu inisiál ba dalan maturidade nian ne'ebé kle'an. ... Iha knaar serbí sira ne'ebé kiak liu, foin-sa'e feto no mane sira bele exprime sidadania evanjéliko rasik no prepara an atu intervein iha nivel oioin iha “polis” nu'udar ema neon-na'in, responsavel no promotór justisa no damen nia.”

LOME 90

Salezianu sira, iha *Kapítulu Jerál 23* dehan: “Ami fiar katak Maromak sei hein daudaun ita iha foin-sa'e sira atu bele oferese mai ita grasa enkontru nian hamutuk ho Nia no atu prepara ita atu serbí Nia iha foin-sa'e sira, hodi rekoñese sira-nia dignidade no hodi eduka sira ba moris naresin”.

Iha sira-nia *Kuadru refere nian kona-ba Pastorál Juvenil Saleziana*, iha paj. 121 hakerek: “Importante katak servisu mosu husi deseju loos moris nian no promosaun moris nian.” No iha paj. 125: “Vokasaun ba serbisu edukativu presiza kapasidade atu husu ba ita-nia an ka atu husik ema seluk husu mai ita kona-ba ita-nia konviksaun, ita-nia motivasaun no aspetativa sira.”

Iha paj 158, bainhira ko'alia kona-ba Dom Bosco nia fuan misionáriu, bele lee: “Animasaun misionária no voluntariadu ogin loron lori misionariu sira atu fahe no voluntariu sira atu asumi visaun vokasaional moris nian: presente ne'ebé simu degrasa no fahe hodi serbí moris ba ema hotu.”



PERGUNTA ruma atu bele haburas ita-nia esperiénsia nu'udar animadór

- ♦ Iha esperiénsia Kreda nian no iha tradisaun saleziana, sai gia ka animadór povu/foin-sa'e sira nian la'ós “privileju” ida, maibé serbisu ida ne'ebé husu atu oferese ita-nia an no prontu atu sakrifika an ba foin-sa'e sira nia di'ak. Nu'udar grupu animadór sira nian, oinsá ita tulun malu atu la buka ita-nia interese, maibé atu buka ema seluk nia di'ak?
- ♦ Oinsá ita hala'o ita-nia “poder” animadór sira nian?
- ♦ Saida mak impede ka susar sa de'it ita hasoru atu moris ho estilu serbisu nian?

ORASAUN

- ♦ Ami hahi'i Ita, Na'i, tanba Ita haraik mai ami Dom Bosco no Madre Mazzarello nu'udar modelu serbisu nian ba foin-sa'e sira. Ita haraik ba sira presente oinoin grasa nian, atu sira bele hala'o misaun ne'ebé Ita entrega ba sira, hodi loke an ba Espiritu Santu.
- ♦ Ami harohan: tulun ami atu realiza buat ne'ebé sira hanorin no moris tuir sira-nia hahalok sira, atu ami bele kontinua Ita-nia prezensa iha foin-sa'e no labarik sira leet, hodi serbí sira ho fidelidade, aten-barani no perseveránsia, liuliu ho fuan ida ne'ebé sensível no laran luak. Amen